

Git ned mke'a Pedr

Le'a Pedr mke'a git ned ndee ndo' be xmen Cristo, zha na ugap ndanno be men bexa ta na nak bexa xmen Cristo. Le'a git ndee ntenxe'a be men wa uxik bexa ndo' be ta kwea' nseatid bexa, no iten ladna bexa ta na nkenkea' bexa usa'a Dios ndo' bexa, no yoo bexa lak nsabndo' gun dub xmen Cristo, xa na ilengal stub biaj.

Pedr nidi'izh ndo' bexa ncho pla región

¹ Le'a na' ndee Pedr, xa mtu'ub Jesucristo gun na' ti'in ten xa. Nke'a na' git ndee ndo' bego na na'anpa lazh na ndencho, bego na lba'a ndencho Ponto no Galacia no Capadocia no Asia no Bitinia. ² Le'a Tad Dios polkata mti bega, no mtsambi'i Espíritu ten Dios gealnaban ten bega, ndontsa uxobgek bega ndo' Dios no utsu'u ten ten Jesucristo be ke ten bega. Na'ab na' ndo' Dios uzhe'eb utsin gak xa ndo' bega no gun xa uzhe'eb wen yoo ladna bega.

Le'a beuna ndenkea' ika'a ta usa'a Dios

³ Le'a Dios Xus Jesucristo Xwan beuna uzhe'eb dub xa wen. Tant nkwea' ladna xa beuna, le'a xa mxiste Jesucristo ndo' gealgut no msa'a xa dub gealnaban kub ndo' beuna. Ta we'e ndenkea' beuna gal uso' beuna ta usa'aka Dios. ⁴ Le'a ta wa ta lá initndo', no ni lá gak bzhi'ik-a, no ni lá gazha'a-yá; ndi nchocha'aw-a gibe'a gast gal zha ika'a beuna-yá. ⁵ Le'a bega nge' ladna Dios, ta we'e le'a Dios nla'ach bega nsea juers

ten xa, ndontsa gapka bega gealnaban kub wa, ta ika'aka bega tiemp ilen ndee.

⁶ Ta we'e uzhebpa nten ladna bega nat, maska nsatid bega sian gealkwea' dub nde'ep. ⁷ Le'a ta na nge' ladna bega Dios wa li gak preb ndo' be gealkwea' wa, lak ndak preb oro ndo' gi'. Ná le'a ta na nge' ladna bega Dios wa uzhebpa mas nsak ndo' oro, le'a oro wa ta nitndo'. Tal le'a bega ta ugeaka nge' ladna Dios, le'a gal wizh ulundo' Jesucristo le'a bega wenka kwe ndo' Dios no gab xa le'a bega wenka li mbin. ⁸ Le'a bega ndankea Jesucristo maska gol ni'í bega xa. No ndangea ladna bega xa maska lá na' bega xa nat. No uzhebpa nten ladna bega gast ni lá ini'í bega xte'e gudi'izh bega-yá. ⁹ Le'a ta na li ndangea ladna bega Cristo, le'a Dios usa'a dub gealnaban kub ndo' bega.

¹⁰ Le'a be profet polta mbidi'izh xte'e uzhe'eb utsin gunno Dios bega, mtsid bexa no uloxnes bexa ná xte'e nak gealnaban usa'a xa wa. ¹¹ Le'a zha biseata ilen Cristo ndo' gizhliyo, le'a Espíritu mlu'u ndo' bexa wa ná xte'e nsabndo' ini'í Cristo be gealkwea', no xte'eta uzhe'eb ta chul yoo tso'o wa. Ta we'e mkwa'an bexa ná ton gak Cristo, no pol ilen xa ndo' gizhliyo. ¹² Le'a Dios mluu ndo' bexa wa le'a ta ndadi'izh bexa wa na'anpa yoo zha bi ncho bexa wa, le'a ta wa ndi yoo zha na ncho beuna ndee. Le'a ta wa di'izh wen mbidi'izh be men ndo' bega ta msa'a Espíritu ten Dios uto'o gibe'a ba'. No gast be angel ten Dios nlad yakbe'ena be ta wa.

Dios nlad uzhe'eb umbi'i gak gealnaban ten

beuna

¹³ Ta we'e list ute bega, no utsin binbe'e bega, no bge' ladna bega le'a Dios uzhe'eb utsin gunno bega zha ilen Jesucristo. ¹⁴ Gok bega cuent dub me'ed nxobgek ndo' xus na. Yá lá gunta bega be ta ugap mbin bega zha na lá nchando' bega Dios. ¹⁵ Ndi umbi'i gok bega ndo' Dios guni'i xta'an ndun bega, lak umbi'i nak Dios xa na le'a mti bega wa. ¹⁶ Lak nkeani'i di'izh ten Dios ndab xa: "Umbi'i gok bega ndo' na', lak umbi'i nak na'."

¹⁷ Le'a Dios na'anpa nti men, le'a xa ndi utsin gab ndo' itea be men xte'e nak ta ndun bexa. Le'a bega ndab le'a xa wa Xus bega, ta we'e ndo' itea be ta ndun bega nsabndo' gap bega mod ndo' xa idub tiemp nban bega ndo' gizhliyo ndee. ¹⁸ Le'a Dios ulo'o bega ndo' be ta na'an xti'in mbin bega lak mbin be usan gox ten bega. Ná le'a bego uni'íka le'a gealnaban ten bega na'anpa isi'i Dios no oro nsea plata, be ta initndo'. ¹⁹ Le'a Dios ndi usi'i gealnaban ten bega wa no ten ten Cristo. Le'a xa wa ngut sakndo' beuna, cuent dub borreg ndon umbi'i nak. ²⁰ Le'a ta wa ta mbinbe'e Dios zha biseata gaknde'e gizhliyo, ná le'a gast tiemp ndee ulen Cristo, xa na nkwea' ladna bega. ²¹ Le'a juers ten ta li mbin Cristo wa le'a bega ndangea ladna Dios, xa na le'a mxiste Cristo ndo' gealgut, no msa'a xa sa ndon le'a nsak nsob Cristo. Ta we'e nge' ladna bega Dios no ndenkea' bega gal wizh gal uso' bega ta ndab xa wa.

²² Nat le'a Espíritu ten Dios ndakno nxobgek bega ndo' gealngea ten Dios. Le'a gealnaban ten bega li msambi'ila ndo' Dios, ndontsa ikwea'

ladna bega be ltsa'a bega, bexa no nak xmen Dios. Nat li bin bega idub ncho ladna bega no ni dub ta ugap lá gunbe'e bega. ²³ Le'a bega nak cuent dub men ti ngol stub biaj. Ná le'a gealnaban kub ten bega wa na'anpa ta initndo'. Le'a gealnaban wa ta nsa'a di'izh ten Dios, dub ta nban, dub ta nunk lá initndo'. ²⁴ Lak ndab di'izh ten Dios:

Le'a itea be men nak cuent dub ya gé'e.

Le'a itea be ta wen ndun bexa nak cuent gé'e ten ya wa.

Le'a ya wa ta nbid, no gé'e ten na ta nyab,

²⁵ ná le'a di'izh ten Dios ta lá initndo'.

Le'a di'izh wa di'izh wen ten Cristo, ta mbidi'izh bexa ndo' bega.

2

¹ Nat bla'a bega iteanak be ta ugap nak bega, no itea be gealkwi'in ndun bega, no dub ta na'anpa ugea nak bega. No lá gaklono bega be men ndap ta'a, no lá gudi'izhta bega be cuent gix.

² Le'a lak dub medo'o nkwa'an chizh goo na, no liga bkwa'an bega di'izh ten Dios, ndontsa li mas igondo' bega Dios, no gap bega gealnaban. ³ Le'a bega yá uni'íka le'a Dios wen nak ndo' bega.

Cristo nak cuent dub ge' ndon le'a nsak

⁴ Ubii bega wats Cristo, xa nak cuent dub ge' nban. Le'a be men mxelad xa wa, ná le'a Dios mti xa cuent dub ge' ndon le'a nsak. ⁵ Le'a bego no nak cuent be ge' nban. Ta we'e bla'a bega le'a Dios gunti'in bega gak bega lid Dios. No

gak bega cuent dub ule'ay mti Dios, cha juers ten Jesucristo gun bega be ta nsak ladna Dios, le'a ta wa cuent dub xnab usa'a bega ndo' Dios.
 6 Lak nkeani'i di'izh ten Dios, ndab Dios cuent ten Cristo:

Bwi'i bego le'a gezh Sion uxo'ob na' dub ge' ned nbexan ni'i.
 Le'a ta wa dub ge' mti na', ta ndon le'a nsak.
 Le'a tal ton ige' ladna xa nak ge' wa,
 le'a bexa wa nunk na'anpa ido ladna.

7 Le'a cuent ten bego na li nge' ladna Cristo wa, le'a xa wa uzhe'eb dub xa nsak. Parea le'a cuent ten bexa na'anpa nge' ladna xa, le'a di'izh ten Dios inde'e ndab:

Le'a ge' na mxelad bexa ndande'e ni'i,
 nat le'a ta wa le'a nak ge' ndon le'a nsak nbexan ni'i.

8 No ndab-a:

Le'a ge' wa ta nkate'eb be men gast nlayat bexa.

Le'a bexa wa li nkate'eb geal le'a bexa lá nxobgek ndo' di'izh ten Dios, lak uni'í Dios gun bexa.

Gezh ten Dios

9 Nā le'a bega nak xmen Dios, le'a Dios mti bega gak bega cuent ule'ay gun ti'in ndo' Dios, xa ndon le'a nibe'e. Le'a bega nak cuent dub nacion umbi'i nak ndo' Dios, dub gezh ten Dios, ndontsa gudi'izh bega be ta wen ndun Dios, xa na le'a ulo'o bega ndo' sa ukaw ndontsa kwe bega ndo'

xe'a chul ten xa. ¹⁰ Le'a polta le'a bega na'anpa nak gezh ten Dios, ná nat le'a bega myakla gezh ten xa wa. Le'a polta le'a bega lá ini'í ti nkwea' ladna Dios bega, ná nat le'a bega uni'íka ta wa.

Xte'e nsabndo' gak be xmen Dios

¹¹ Bego amig ten na', le'a ndo' gizhliyo ndee na'anpa lazh beuna, le'a beuna ga dub nseatid ndo'-yá. Ta we'e na'ab na' ndo' bega gun bega juers lá gun bega be ta ugap nlad bega, le'a be ta wa uka gun bega be ta nlad Dios. ¹² Uzhebpa wen gok bega ndo' bexa lá nchando' Dios, bexa nisi bega, ndab bexa le'a bega xa ugap. Le'a gal gor ini'í bexa be ta wen ndun bega, we'e yankea bexa Dios gal wizh ilen Cristo.

Nsabndo' uxobgek bexa ndo' bexa nakti'in

¹³ Le'a ta na nak bega xmen Cristo, ta we'e bxobgek bega ndo' itea bexa nakti'in. Ndo' xa nibe'e Roma bxobgek bega, le'a xa wa ndon le'a nibe'e. ¹⁴ No ndo' be xmen xa wa bxobgek bega, le'a xa ntu'ub bexa utsaksi bexa be men ndun ta ugap, no utsin gak bexa ndo' be men ndun ta wen. ¹⁵ Le'a Dios nlad li wen gak bega, ndontsa yá na'antapa inisi be men bega, bexa lá nchando' Dios no na'anpa nsakyo'ón bexa.

¹⁶ Le'a Dios ulo'o bega ndo' be ke ten bega, ndontsa gun bega ti'in ndo' Dios, na'anpa gun bega be ta ugap. ¹⁷ Gop bega mod ndo' iteanak be men. No bkwea' ladna bega bexa no nak xmen Cristo. No bxobgek bega ndo' Dios, nsea gop bega mod ndo' xa nibe'e Roma.

Ta nsabndo' gun bexa ncho ndo' ya'a stubga men

¹⁸ Bego na ncho ndo' ya'a stubga men, gop bega mod ndo' xa nak xwan bega, no bxobgek bega ndo' xa. Li bin bega ndo' bexa utsin nak no ndo' bexa uxax nak. ¹⁹ Le'a Dios nten ladna gor na nxik bega ndo' dub gealkwea' ni lá nsabndo' itid bega, ta na ndun bega lakta nlad Dios gak bega. ²⁰ Tal le'a dub men ntsaksi bega ta na ndun bega dub ta ugap, cha uxik bega ndo' gealkwea' wa, na'anpa nsabndo' itenno ladna bega ta wa. Ná tal le'a bega ntid dub gealkwea' ta na ndun bega ta wen, no nxik bega ndo' gealkwea' wa, le'a ta wa ta nsak ladna Dios.

²¹ Le'a Dios mti bega li gun bega ta wa, le'a lak mxik Cristo ndo' be gealkwea' sakndo' beuna, no liga nsabndo' uxik beuna. ²² Le'a Cristo nunk lá ngun dub ta ugap, no ni dub gealkwi'in lá ngun xa. ²³ Le'a gor na unisi bexa xa wa, le'a xa wa ni dub di'izh xela lá ika'ab ndo' bexa wa. No gor na mtsaksi bexa xa, le'a xa ni dub ta ugap lá ngab ndo' bexa wa. Ndi mla'a xa ta wa cuent ten Dios, xa na utsin gab ndo' itea be men ná ton ndap ke. ²⁴ Le'a Cristo wa le'a mbi'i be ke ten beuna ngut xa ndo' cruz, natsa ula'a beuna be ta ugap nak beuna nsea iban beuna gun beuna ta wen. Le'a ta na utid Cristo ndo' be gealkwea' wa, ta we'e le'a bego myakna. ²⁵ Le'a polta utesea bega cuent be borreg, ma ukegix. Ná nat myach bega wats Cristo, xa nla'ach gealnaban ten bega lak bexa nla'ach be borreg ten na.

3

Ta nsabndo' gak be xagots no be xabgi'i

¹ No liga le'a bego xagots, bxobgek bega ndo' xabgi'i ten bega. Tal le'a bexa lá ndangea ladna di'izh ten Dios, le'a ncho xa gungeaka ladna-yá gor na na' xa xte'e nak bega, lá nki'in uzhe'eb gudi'izh bega-yá ndo' xa. ² Le'a xa ina' xte'e utsin nak bega no xte'e umbi'i nak bega ndo' Dios. ³ Le'a ta ndun chul nak bega wa na'anpa ta nsaxkwa'a bega gek bega no be ta oro no be lad uyap ndanti'in bega. ⁴ Le'a ta na chul nak bega wa, le'a ta wa ta ncho len lado'o bega, dub ta lá initndo'. Le'a ta wa ta na utsin nak bega no bcha'an nak bega, le'a be ta we'e uzhebpa ta nsak ndo' Dios. ⁵ Li ngok be xagots polta, bexa wen ngok ndo' Dios. Le'a bexa wa mge' ladna Dios, no mxobgek bexa ndo' xabgi'i ten bexa. ⁶ Lak mxobgek Sara ndo' Abraham, ndab xa le'a Abraham le'a nak xa nibe'e xa. Le'a bega slaya' gak lak ngok Sara wa, tal le'a bega gun be ta wen no ni na'an xta'an izheb bega.

⁷ No liga bego xabgi'i, uzhebpa bla'ach bega xagots ten bega no utsin gok bega ndo' xa. Le'a xa wa cuentta dub vas lid bid ile'a, ná le'a Dios dubtsa gealnaban kub msa'a ndo' bega no ndo' be xagots wa. Li gak bega ndontsa na'an xta'an gun gan lá go'ón Dios ta inab bega ndo' xa.

Ta nsabndo' gun itea be xmen Cristo

⁸ Nat itea bego ba', na'anpa kuyo bega, no blats ladna bega be ltsa'a bega, no bkwea' ladna bega bexa, no utsin gok bega ndo' bexa, no lá izhinna bega. ⁹ Ná tal ncho xa ugap gunno bega, na'anpa cha noga bega li ugap gunno xa wa. No tal ton inisi bega, na'anpa cha noga bega li inisi xa wa.

Ndi unab bega ndo' Dios utsin gunno Dios xa, le'a Dios le'a mti bega li gun bega, ndontsa utsin gunno Dios bega. ¹⁰ Lak nkeani'i di'izh ten Dios, ndab-a:

Le'a tal ton nlad wen yoo, no ini'í xa be wizh wen,
lá gudi'izh xa ta ugap no ni lá gun xa gealkwi'in.

¹¹ No ula'a xa be ta ugap,
cha ndi utsin gak xa.

No ukwa'an xa wen yo'ono xa be men,
no idub tiemp li nsabndo' gun xa.

¹² Le'a Dios nla'ach be men wen,
no ndo'ón xa xta'an ndab bexa.

Ná le'a Dios ndakloo ndo' be men ndun ta ugap.

Bexa ndangea ladna Cristo ntid be gealkwea'

¹³ ¿Tonma dub xa xela gunno bega, tal le'a bega sbe'en ta utsin ndun? ¹⁴ Ná tal le'a bega ini'í dub gealkwea' ta na utsin nak bega, le'a Dios gun wen yoo ladna bega. Ta we'e na'an ton ndo' ná izheb bega, no ni lá yu' ladna bega. ¹⁵ Ndi len lado'o bega wankea bega Cristo Xwan beuna. No list gok bega ndontsa isu'u bega ika'ab bega guni'i ton inabdi'izh ndo' bega cuent ten ta nge' ladna bega Cristo. No utsin ika'ab bega gap bega mod ndo' xa. ¹⁶ We'e le'a bexa na xela ní'i ndo' bega ndi ido ladnabe, gor ini'í bexa be ta wen ndun bega nak xmen Cristo.

¹⁷ Tal le'a Dios nlad, mas wen ini'í bega dub gealkwea' ta na ndun bega dub ta wen, ni ka ini'í bega dub gealkwea' ke na gun bega dub ta ugap. ¹⁸ Le'a Cristo uni'í gealkwea' gast ngut xa,

ndontsa myu'u be ke ten beuna. Le'a xa wa ni dub ke lá ndap, ná le'a xa ngut sakndo' iteanak be men ndun be ta ugap, natsa yo'o xa beuna wats Dios. Le'a be'al las xa ngutka, ná le'a bi ten xa nbanka. ¹⁹ Cha li ngwa'yadi'izh bi ten xa ndo' xbi be men ndenchonyaw. ²⁰ Le'a ta wa bexa lá uxobgek ndo' Dios tiemp xapta, zha na ukenkea' Dios naga syach be men wats xa, zha na mbinde'e Noé dub barco si'il. Le'a ta wa uyo'o dub xo'ontsa men len na, bexa lá ngat ndo' gilog wa. ²¹ Le'a ta utid bexa wa nak cuent ta ntalea' beuna len nits, ta ndun ndap beuna gealnaban ndo' Dios. Na'anpa ntalea' beuna ndontsa ilate mek beuna, ndi ntalea' beuna ndontsa umbi'i gak lado'o beuna ndo' Dios, juers ten ta na mban Jesucristo ndo' gealgut. ²² Le'a Cristo mkea gibe'a, cha nat nsob xa wats Dios lad ga'al. Le'a iteanak be angel nxobgek ndo' xa, no be espíritu nibe'e.

4

Nsabndo' gun bexa ta nsak ladna Dios

¹ No lak uni'í Cristo be gealkwea' zha uyo'o xa ndo' gizhliyo, ta we'e na'anpa izheb bega ini'í bega be gealkwea'. Le'a tal ton itid ndo' be gealkwea', le'a xa wa gun gan ndo' ta ugap, ² ndontsa idub nban xa na'anpa ukwa'an xa be ta nladtsa xa, ndi gun xa ta nsak ladna Dios. ³ Yá utid zha na mbin bega ta na ndal ladna bexa lá nchando' Dios, bexa ndun be ta bzhi'ik, no nak bexa sian ta ugap, no ndun bexa gealgu, no ndesea bexa sa nyo'o gast ndun be men ta ugap, no ndun bexa itea be ta ndal ladna bexa ncho

ndo' gizhliyo, no ndankea bexa be ta na'anpa nak Dios, dub ta uzhebpa lá nsak ladna Dios. ⁴ Le'a nat le'a bexa lá nchando' Dios wa ndanseanabe xte'e lá ndunta bega ltsa'a be ta ugap ndun bexa wa. Ta we'e usalad ndanno bexa bega. ⁵ Parea gal dub wizh le'a bexa wa usa'a cuent ndo' Dios itea be ta mbin bexa, gab Dios ná xte'e nak ta mbin kadga dub men, bexa ndenban no bexa ngutla. ⁶ Le'a bexa ngut wa mbi'ínla di'izh ten Dios zha bi nban bexa, ndontsa ibangal bexa gap bexa gealnaban ndo' Dios, mas ngutla bexa ndo' gizhliyo ndee.

Nsabndo' gakno bexa be ltsa'a xa

⁷ Le'a gizhliyo ndee yamer idub. Ta we'e list ute bega, bidi'izhno tse'e bega Dios. ⁸ Le'a ndo' itea be ta'a, le'a ta ndee ta mas nsak: Uzhebpa bkwea' ladna bega be ltsa'a bega. Le'a tal beuna li gun, le'a beuna sunge' ladna sian ta'a ndanno bexa beuna. ⁹ No utsin gok bega ndo' itea bexa nsea ta lid bega, na'anpa ine'e ladna bega xa. ¹⁰ Utsin binti'in bega be ta ndák bega, ta msa'a Dios ndo' kadga dub bega, ndontsa li gakno bega be ltsa'a bega, lak msa'a Dios gun bega. ¹¹ Le'a bego na ndadi'izh di'izh ten Dios, bidi'izh bega-yá lakkata nak-a. No bego na ndakno be men, bin bega ta wa idub lak juers nsa'a Dios ndo' bega. We'e le'a be men ini'í ta ndun bega wa, cha gab bexa le'a Dios uzhe'eb dub xa wen juers ten Jesucristo, xa ndon le'a wen no ndon le'a juert ndo' itea be ta'a idub tiemp. Lika nak-a.

Be xmen Cristo itid ndo' be gealkwea'

¹² Bego amig ten na', lá yanseana bega gor na uzhebpa kwea' ncha'tid bega, le'a ta wa ga lika gak. ¹³ Ndi bten ladna bega geal no bega nsatid ltsa'a be gealkwea' utid Cristo, ndontsa liga uzhebpa iten ladna bega wizh ilengal xa. ¹⁴ Tal le'a be men xela ní'i ndo' bega ke na nak bega xmen Cristo, uzhebpa wen yoo ladna bega, le'a ta ndun bexa wa nluu le'a Espíritu ten Dios ncho lado'o bega. Le'a bexa wa kwea' ní'i ndo' Cristo, ná le'a bega ndi ndun ta nsak ladna Cristo. ¹⁵ Le'a bexa na ndut men nsabndo'ka ini'í gealkwea', no liga bexa ndun gealwa'an, no bexa ndun ta ugap, no bexa nyote ndo' ta ten stubga men. Parea le'a bega na'anpa li nak. ¹⁶ Ná tal le'a bega ini'í gealkwea' ta na nak bega xmen Cristo, lá ido ladna bega; ndi bsa'a bega xno ndo' Dios le'a bega nak xmen xa.

¹⁷ Le'a nat yamer isaxan tiemp ini'í be men be gealkwea'. Le'a beuna nak xmen xa ned ini'í gealkwea' wa, we'e mas juert yoo be men lá nxobgek ndo' di'izh wen ten Dios. ¹⁸ Lak nkeani'i di'izh ten Dios, ndab-a:

Le'a be men wen sian be gealkwea' itid ndontsa
 gap xa gealnaban,
 ¿mata gal bexa ugap nak, bexa ndap ke ndo'
 Dios?

¹⁹ Tal le'a bega itid ndo' be gealkwea' lak nlad Dios, byun bega cuent gealnaban ten bega ndo' Dios xa mbinde'e bega, no bin bega be ta wen ndo' Dios, le'a xa wa na'anpa ula'a bega.

5

Ti'in ten bexa nchansu be xmen Cristo

¹ Le'a na' ndee nak dub xa nchansu be xmen Cristo, no uní na' xte'e utid Cristo be gealkwea', no gal uso' na' dub sa iso'ob na' wats Cristo zha ilen xa. Ta we'e na'ab na' ndo' bego na nchansu be xmen Cristo, ² utsin bla'ach bega bexa wa, le'a Dios msa'a bexa ula'ach bega. Bin bega ta wa idub ncho ladna bega, na'anpa cuent dub ta lajuerska gun bega. No na'anpa ukwa'an bega med, ndi gaknotsa bega bexa lak nlad Dios. ³ No na'anpa gak bega cuent dub xa le'a nibe'e bexa wa, ndi utsin gok bega ndontsa ini'í bexa xte'e nsabndo' gak bexa. ⁴ We'e gor na ilen Cristo xa na nchansu beuna, le'a bega gal uso' dub ta uzhebpa nsak, ta nunk lá idub.

Ta nsabndo' gun itea be xmen Cristo

⁵ No liga bego bexa ben nsabndo' uxobgek bega ndo' bexa nchansu bega. Iteanak bega utsin gok ndo' be ltsa'a bega, na'anpa izhinna bega. Le'a di'izh ten Dios nkeani'i ndab-a:

Le'a Dios lá ndakno bexa zhin,
le'a xa ndi ndakno bexa bcha'an nak.

⁶ Byak byux bega ndo' ya'a Dios xa ndon le'a juert, we'e uxapso Dios bega gal zha li nsabndo' gun xa. ⁷ Bla'a bega itea be ta nyu' ladna bega ndo' ya'a Dios, le'a Dios nla'achka bega.

⁸ List ute bega no bla'ach bega, le'a maxu'u ndakloo ndo' bega nlad utsabgix bega. Le'a maxu'u nkesea cuent dub mbi'izh nbezh, nke-seakwa'an ma ta gaw ma. ⁹ Lá ula'a bega gak

ta nlad maxu'u, ndi mas bge' ladna bega Dios. Le'a bego uni'íka le'a be gealkwea' ntid bega wa, le'a idub ndo' gizhliyo ndee ndencho ltsa'a bega nokaga lba'a ncha'tid ndo' gealkwea'. ¹⁰ Le'a zha na yá utidla bega ndo' ta wa dub nde'ep, le'a Dios gun ga'al gak bega, no gakno xa bega, no gun xa juert gak lado'o bega, no mas ige' ladna bega xa. Le'a Dios le'a nkwea'pa ladna beuna, no mti xa beuna yoo beuna wats Jesucristo gibe'a idub tiemp. ¹¹ ¡Le'a Dios ndon le'a nsak no nibe'e xa idub tiemp! Lika nak-a.

Be ta lult unidi'izh Pedr

¹² Le'a Silvano ngokno na' mke'a besa git tuzh ndee. Le'a na' gáp le'a xa ndee dub xa ugeaka nak xmen Cristo. Mke'a besa git ndee ndontsa utenxe'a na' bega, no ini'í bega le'a Dios ta ugeaka nkwea' ladna bega. ¡Lá yalad bega ta wa!

¹³ Le'a iteanak bexa nak xmen Cristo ndencho Babilonia ndee, bexa na mti Dios lak mti Dios bega, le'a bexa wa nidi'izh ndo' bega. No Marc xa nak cuent xi'ín na' no nidi'izh ndo' bega.

¹⁴ Unidi'izh bega ndo' be ltsa'a bega sakndo' na', ta na nluu le'a bega nkwea' ladna bexa.

Le'a Dios gun wen yoo ladna bega nak xmen Jesucristo. Lika gak-a.

**Be di'izh nsa'a gealnaban
Zapoteco, San Vicente Coatlán: Be di'izh nsa'a
gealnaban New Testament**

copyright © 2015 Wycliffe Bible Translators, Inc.

Language: Zapotec, San Vicente Coatlán

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 31 Jan 2023 from source files
dated 29 Jan 2022

21c20591-ea7e-5ff5-b188-539398faf46d